

四庫全書

史部

欽定四庫全書

史部

山西通志卷二百二十六

詳校官給事中臣王鍾健

檢討

臣

德生覆勘

總校官進士臣朱齡

校對官主簿臣汪日贊

謄錄監生臣王寶唐

欽定四庫全書

山西通志卷二百二十六

藝文

五四十

詩六

七絕

唐

崔處士林亭

王維

綠樹陰濃蓋四隣
青苔日厚自無塵
科頭箕踞長松下
白眼看他世上人

贈裴旻將軍

腰間寶劍七星文，臂上瑯弓百戰勲。
見說雲中擒黠虜，始知天上有將軍。

渭城曲

渭城朝雨浥輕塵，客舍青青柳色新。
勸君更盡一杯酒，西出陽關無故人。

寄韓鵬

李頎

爲政心閒物自閒，朝看飛鳥暮飛還。
寄書河上神明宰，

羨爾城頭姑射山

送薛大夫赴安陸

王昌齡

津頭雲雨暗湘山
遷客離憂楚地顏
遙送扁舟安陸郡
天邊何處穆陵關

塞下

常建

鐵馬胡裘出漢營
分麾百道救龍城
左賢未遁旌竿折
過在將軍不在兵

虢州後亭送李判官使赴晉絳

岑參

西原驛路挂城頭客散紅亭雨未收
君去試看汾水上白雲猶似漢時秋

獻封大夫破播仙凱歌六首

漢將承恩西破戎捷書先奏未央宮
天子預開麟閣待祇今誰數貳師功

官軍西出過樓蘭營幕傍臨月窟寒
蒲海曉霜凝馬尾葱山夜雪撲旌竿

鳴笳疊鼓擁回軍破國平蕃昔未聞
丈夫鵲印搖邊月

大將龍旗掣海雲

日落轅門鼓角鳴
千羣面縛出蕃城
洗兵魚海雲迎陣
秣馬龍堆月照營

蕃軍遙見漢家營
滿谷連山遍哭聲
萬箭千刀一夜殺
平明流血浸空城

暮雨旌旗濕未乾
胡煙白草日光寒
昨夜將軍連曉戰
蕃軍只見馬空鞍

涼州詞

集異記云開元中王之渙與王昌齡高適齊名共詣旗亭貰酒小飲有梨園伶官十數

人會識三人因避席暇映擁爐以觀焉俄有妙妓四輩奏樂皆當時名部昌齡等私相約曰我輩各擅詩名每不自定甲乙今者可以密觀諸伶所謳若詩入歌詞之多者爲優初謳昌齡詩次謳適詩又次復謳昌齡詩之渙自以得名已久因指諸妓中最佳者曰待此子所唱如非我詩即終身不敢與子爭衡次至雙鬟發聲果謳黃河云云因大諧笑諸伶詣問語其事乃競拜乞就筵席三人從之飲醉竟日

王之渙

黃河遠上白雲間一片孤城萬仭山羌笛何須怨楊柳春光不度玉門關

過宋氏五女舊居

竇常

謝庭風韻婕妤才天縱斯文去不迴一宅柳花今似雪
鄉人擬築望仙臺

河中府崇福寺看花

盧綸

聞道山花如火紅平明登寺已經風老僧無見亦無說
應與看人心不同

題伯夷廟

中條山下黃礪石壘作夷齊廟裏神落葉滿階塵滿座
不知澆酒爲何人

將赴京留獻令公

沙鶴驚鳴野雨收
大河風物颯然秋
力微恩重諒難報
不足行人不解愁

度破訥沙二首

李益

眼見風來沙旋移
經年不省草生時
莫言塞北無春到
總有春來何處知

破訥沙頭鴈正飛
鷓鴣泉上戰初歸
平明日出東南地
滿磧寒光生鐵衣

夜上受降城聞笛

回樂峯前沙似雪
受降城外月如霜
不知何處吹蘆管
一夜征人盡望鄉

上黃堆烽

心期紫閣山中月
身過黃堆烽上雲
年髮已從書劍老
戎衣更逐霍將軍

昭君詞

李端

李陵初送子卿回
漢月明明照帳來
憶著長安舊遊處

千門萬戶玉樓臺

裴十六廳即事

劉商

主人能政訟庭閒
帆影雲峯戶牖間
每到夕陽嵐翠近
只言籬障倚前山

送紅線

冷朝陽

採菱歌怨木蘭舟
送客魂銷百尺樓
還似洛妃垂霧去
碧天無際水空流

太原贈李屬侍御

楊巨源

路入桑乾塞鴈飛
棗郎年少有光輝
春風走馬三千里
不廢看花君繡衣

題五老峯下費君書院

解向花間栽碧松
門前不負老人峯
已將心事隨身隱
認得溪雲第幾重

奉使鎮州行次承天行營奉酬裴司空

韓愈

竄逐三年海上歸
逢公復此著征衣
旋吟佳句還鞭馬

恨不身先去鳥飛

夕次壽陽驛題吳郎中詩後

風光欲動別長安
春半邊城特地寒
不見園花兼巷柳
馬頭惟有月團團

讀蘇屬國傳

陳羽

天山西北居延海
沙塞重重不見春
腸斷帝鄉遙望日
節旄零落漢家臣

美溫尚書鎮定興元以詩寄賀

劉禹錫

旌旗入境犬無聲
戮盡鯨鯢漢水清
從此世人開耳目
始知名將出書生

題石勒城二首

呂溫

長驅到處積人頭
大旆連營壓上游
建業烏棲何足問
慨然歸去王中州

天生傑異固難馴
應變摧枯若有神
夷甫自能疑倚嘯
忍將虛誕誤時人

讀鄂公傳

白居易

高臥深居不見人功名斗數似灰塵
唯留一部清商樂月下風前伴老身

登甘露臺

劉言史

偶至無塵空翠間
雨花甘露境間
身心未寂終爲累
非想天中獨退還

旅次文水縣喜遇李少府

施肩吾

爲君三日廢行程
一縣官人是酒朋
共憶襄陽同醉處
尚書坐上納銀觥

雲州飲席

酒腸雖滿少歡情
身在雲州望帝城
巡次合當誰改令
先須爲我打還京

贈王屋劉道士

小有洞中長住客
大羅天下後來仙
出門即是尋常處
未可還他跨鶴鞭

過汾水關

張祐

千里南來背日行
關門無事一侯嬴
山根百尺路前去

半夜耳中汾水聲

舜井

朱慶餘

碧甃磷磷不記年青蘿鎖在小山顛
向來下視千山水疑是蒼梧萬里天

再經天涯地角山

雍陶

每憶雲山養短才悔緣名利入塵埃
十年馬足行多少兩度天涯地角來

度桑乾河

南客豈曾諳塞北年年唯見鴈飛回今朝忽渡桑乾水
不似身來似夢來

自蔚州南入真谷有似劔門因有歸思

我家蜀地身離久忽見胡山似劔門馬上欲垂千里淚
耳邊唯欠一聲猿

陰地關見入蕃公主石上手跡

漢家公主昔和蕃石上今餘手跡存風雨幾年侵不滅
分明纖指印苔痕

青塚

杜牧

青塚前頭隴水流
燕支山上暮雲秋
蛾眉一隊窮泉路
夜夜孤魂月下愁

題木蘭廟

彎弓征戰作男兒
夢裏曾經與畫眉
幾度思歸還把酒
拂雲堆上祝明妃

渾河中

李商隱

九廟無塵八馬回
奉天城壘長春苔
咸陽原上英雄骨

半向居家養馬來

所居永樂縣久旱縣宰祈禱得雨因賦詩

甘膏滴滴是精誠晝夜如絲一尺盈祇怪閭閻喧鼓吹
邑人同報東長生

題朝陽巖

牛叢

躡石攀蘿路不迷曉天風好浪花低洞名獨占朝陽號
應有梧桐待鳳棲

皇華鋪題

薛逢

孤戍迢迢蜀路長
鳥鳴山館客思鄉
更看絕頂煙霞外
數樹岩花照夕陽

伏牛山

薛能

虎蹲峰狀屈名牛
落日連村好望秋
不爲時危耕不得
一犁風雨便歸休

蒲中齋後晚望

河邊霽色無人見
身帶春風立岸頭
濁水茫茫有何意
日斜還向古蒲州

太原使院晚出

青門無路入清朝
濫作將軍最下僚
同舍盡歸身獨在
晚風開印葉蕭蕭

渡桑乾河

賈島

客舍并州已十霜
歸心日夜憶咸陽
無端更渡桑乾水
却望并州是故鄉

題河中紫極宮

溫庭筠

昔年曾伴玉真遊
每到仙宮即是秋
曼倩不歸花落盡

滿叢煙露月當樓

隨邊使過五原

儲嗣宗

偶逐星車犯虜塵故鄉常恐到無因
五原西去陽關廢日漫平沙不見人

聞河中王鐸加都統

高駢

煉汞燒鉛四十年至今猶在藥爐前
不知子晉緣何事只學吹簫便得仙

澠池

汪遵

西秦北趙各稱高池上張筵列我曹何事君王親擊缶
相如有劍可吹毛

晉河

風引征帆管吹高晉君張晏侯雄豪舟人笑指千餘客
誰是煙霄六翮毛

自河西歸山二首

司空圖

一水悠悠一葉危往來長恨阻歸期鄉關不是無華表
自爲多驚獨上遲

水濶風驚去路危孤舟欲上更遲遲
鶴羣長擾三珠樹不借人間一隻騎

憶中條

燕辭旅舍人空在螢出疎籬菊正芳
堪恨昔年聯句地念經僧掃過重陽

故鄉杏花

寄花寄酒喜新開左把花枝右把杯
欲問花枝與杯酒故人何得不同來

證因亭

峰北幽亭願證因他生此地却容身上方僧在時應到
笑認前銜記寫真

光啓丁未別山

草堂琴畫已拌燒猶託鄰僧護燕巢此去不緣名利去
若逢逋客莫相嘲

虞鄉北原

澤北邨貧煙火穉稚田冬旱倩牛耕老人惆悵逢人訴

開盡黃花麥未金

上方

花落更同悲木落鶯聲相續即蟬聲榮枯了得無多事
只是閒人漫繫情

王官二首

風荷似醉和花舞沙鳥無情伴客閒總是此中皆有恨
更看微雨半遮山

荷塘煙罩小齋虛景物皆宜入畫圖盡日無人只高臥

一雙白鳥隔紗厨

李居士

高風只在五峰前應是精靈降作賢
萬里無雲惟一鶴鄉中同看却昇天

修火亭五首

山前鄰叟去紛紛獨強衰羸愛杜門
漸覺一家看冷落地爐生火自溫存

甘心七十且酣歌自算平生幸已多
不似香山白居易

晚將心地著禪魔

烏紗巾上是青天檢束酬知四十年誰料平生臂鷹手
挑燈自送佛前錢

少年已慣擲年光時節催驅獨不忙今日無疑亦無病
前程無事擾醫王

籬落輕寒整頓新雪晴步履會諸鄰自從南至歌風頂
始見人煙外有人

力疾山下吳村看杏花十九首

春來漸覺一川明
馬上繁花作陣迎
掉臂只將詩酒敵
不勞金鼓助橫行

闔闔曾排捧御鑪
猶看曉月認金鋪
羸形不畫凌煙閣
只爲微才激壯圖

鏡留雪鬢暖消無
春到梨花日又晡
移取扶桑堦下種
年年看長礙金烏

折來未盡不須休
年少爭來莫與留
更願狂風知我意
一時吹向海西頭

才情百巧鬪風光却笑雕花刻葉忙
熨帖新巾來與裹猶看騰踏少年場

浮世榮枯總不知且憂花陣被風欺
儂家自有麒麟閣第一功名只賞詩

白衫裁袖本教寬朱紫由來亦一般
王老小兒吹笛看我儂試舞爾儂看

單牀薄被又羈棲待到花開亦甚迷
若道折多還有罪只應鶯轉是金雞

近來桃李半燒枯歸臥鄉園只老夫莫算明年人在否
不知花得更開無

漢王何事損精神花滿深宮不見春穠艷三千臨粉鏡
獨悲掩面李夫人

能艷能芳自一家勝鸞勝鳳勝煙霞客來須共醒醒看
碾盡明昌幾角茶

造化無端欲自神裁紅剪翠爲新春不如分減閒心力
更助英豪濟活人

徘徊自勸莫沾纓分付年年谷口鶯却賴無情容易別
有情早箇不勝情

閒步偏宜舞袖迎春光何事獨無情垂楊合是詩家物
只愛敷溪道北生

亦知王大是昌齡杜二其如律韻清還有酸寒堪笑處
擬誇朱紱更崢嶸

潘郎愛說是詩家枉占河陽一縣花千載幾人搜警句
補方金字愛晴霞

行樂溪邊步轉遲
出山漸減探花期
去年四度今三度
恐到憑人折去時

此身衰病轉堪嗟
長忍春寒獨惜花
更恨新詩無紙寫
蜀牋堆積是誰家

昨日黃昏始看回
夢中相約又銜杯
起來聞道風飄却
猶擬教人掃取來

代崇徽公主意

李山甫

金釵墜地鬢堆雲
自別朝陽帝豈聞
遣妾一身安社稷

不知何處用將軍

傅巖

胡曾

巖前版築不求仲方寸那希據要津自是武丁安寢夜
一宵宮裏夢賢人

泝水

韓信經營按鎮鉶臨戎叱咤有誰加猶疑轉戰逢勍敵
更向軍中問左車

馬陵

墜葉蕭蕭九月天
驅兵獨過馬陵前
路旁古木蟲書處
記得將軍破敵年

首陽山

孤竹夷齊恥戰爭
望塵遮道請休兵
首陽山倒爲平地
應始無人說姓名

摩笄山

春草綿綿代日低
山邊立馬看摩笄
黃鶯也解追前事
來向夫人死處啼

長平

長平瓦震武安初趙卒俄成戲鼎魚四十萬人俱下世
元戎何用讀兵書

平城

漢帝西征陷虜塵一朝圍解議和親當時已有吹毛劍
何事無人殺奉春

箕山

寂寂箕山春復秋更無人到此溪頭葉瓢巖畔中宵月

千載空聞屬許由

居延

漠漠平沙際碧天問人云此是居延停驂一顧猶魂斷
蘇武曾禁十九年

李陵臺

北入單于萬里疆五千兵敗滯窮荒英雄不伏蠻夷死
更築高臺望故鄉

黃河曉渡

羅鄴

大河平野正窮秋
羸馬羸僮古渡頭
昨夜蓮花峰下月
隔簾相伴到明愁

初秋到慈州冬首換絳牧

唐彥謙

秋杪初攀玉樹枝
隔年無計待春暉
自嫌暫作仙城守
不逐鶯來共燕飛

北齊

草草招提強據鞍
周師乘勝莫回看
背城冒戰知虛實
爭奈人前忍笑難

塞上曲

周朴

一陣風來一陣砂
有人行處沒人家
黃河九曲冰先合
紫塞三春不見花

借薛尚書集

鄭谷

江天冬暖似花時
上國音塵杳未知
正被蟲聲喧老耳
今君又借薛能詩

并州

韓偓

戍旗青草接榆關
雨裏并州四月寒
誰會憑闌潛忍淚

不勝天際似江干

豫讓

吳融

韓魏同謀反覆深
晉陽三版免成沉
趙襄當面何須恨
不把干將訪負心

豫讓橋

豫讓酬恩歲已深
高名不朽到如今
年年橋上行人過
誰有當時國士心

壺關道中作

韋莊

處處兵戈路不通却從山北去江東
黃昏欲到壺關塞
匹馬寒嘶野草中

垣縣山中尋李書記山居不遇留題河次店

白雲紅樹崕嶺東名烏羣飛古畫中
仙吏不知何處隱
山南山北雨濛濛

青塚

張嬪

傾國可能勝效國無勞冥冥更思回太真
雖是承恩死
祇作飛塵向馬嵬

經慈州感謝郎中

黃滔

金聲乃是古詩流
況有池塘春草儔
莫道宣城獨垂號
雲山彼此謝公遊

張儀

徐夔

荆楚南來又北歸
分明舌在不應違
懷王本是無心者
籠得蒼蠅却放飛

唐堯

周曇

袂氛不起瑞烟輕
端拱垂衣日月明
傳事四方無外役

茅茨深處土堦平

虞舜

進善懲奸立帝功
功成揖讓益溫恭
滿朝卿士多元凱
爲黜堯苗與四凶

舜妃二首

蒼梧一望隔重雲
帝子悲尋不記春
何事淚痕偏在竹
貞姿應念節高人

瀟湘何代泣幽魂
骨化重泉志尚存
若道地中休下淚

金匱要略卷之六
卷二百二十六
不應新竹有啼痕

夷齊

讓國由來義亦乖
不知天命匹夫才
將除暴虐誠能阻
何異崎嶇助紂來

平公

鴻鵠輕騰萬里高
何殊朝野得賢豪
能知異戴寧蒼力
不是蒙茸腹背毛

趙宣子

門人曾不有提彌連嗾呀呀孰敢支臨難若教無苟免
亂朝爭那以蔡爲

郅成子

陳樂無懼壁在隅宰臣懷智有微謨苟非成子當明哲
誰是仁人可托孤

靈輒

失水枯鱗得再生翳桑無地謝深情朱輪未染酬恩血
公子何由見赤誠

叔向

重祿存家不敢言小臣憂禍亦如然明開諫諍能無罪
祗此宜爲理國先

智伯

三國連兵敵就擒晉陽城下碧波深風濤撼處看沉趙
舟楫不從翻自沈

文公

滅虢吞虞未息兵柔秦敗楚霸威成文公徒欲三強服

分晉元來是六卿

景公

覺病當宜早問師
病深難療恨難追
晉侯徒有秦鑿緩
疾在膏肓救已遲

博陸侯

棟梁徒自保堅貞
毀穴難防雀鼠爭
不是主人知詐僞
如何柱石免歌傾

師曠

老能勸學照餘生似夜隨燈到處明
徃行前言如不見暗中無燭若爲行

鮑宣妻

君惡奢華意不歡一言從儉亦何難
但能和樂同琴瑟未必恩情在綺紈

前趙劉聰

戎羯誰令識善言刑將不捨遽能原
垂成却罷鳳儀殿仍改逍遙納諫園

題龍渦洞

張仁溥

折花攜酒看龍渦
鏤玉長旌俊彥過
他日各爲雲外客
碧紗籠却又如何

閒居雜興

陳陶

虞韶九奏音猶在
只是巴童自棄遺
閒臥清秋憶師曠
好風搖動古松枝

王坦之

晉

孫元宴

晉祚安危只此行
坦之何必苦憂驚
謝公合定寰區在

爭遣當時事得成

王恭

晉

春風濯濯柳容儀
鶴氅神情舉世推
可惜教君仗旄鉞
枉將心地托牢之

王僧辨

陳

彼此英雄各有名
石頭高臥擬爭衡
當時堪笑王僧辨
待欲將心託聖明

送客之潞府

韓翃

官柳青青匹馬嘶
迴風暮雨入銅鞮
佳期別在春山裏
應是人後五葉齊

過鴈門次履道韻

宋 類

隴水無情各自流
潘郎雙鬢不禁秋
一天寒色鴈初過
滿地月明人欲愁

題中條靜觀

侯道華
上昇處

鄭 遨

松頂留衣上玉霄
永傳異跡在中條
不知揖徧諸仙否
欲請還丹問昨宵

題端正樹

貞元文士

昔日偏霑雨露榮
德皇西幸賜嘉名
馬嵬此去無多地
合向楊妃冢上生

玉龍子詩

天寶時人

聖運潛符瑞玉龍
自興雲雨更無踪
不如渭水沙中得
爭保鑾輿復九重

寄歐陽詹

太原妓

自從別後減容光
半是思郎半恨郎
欲識舊來雲髻樣

爲奴開取縷金箱

突厥三臺

盛小叢

鴈門山上鴈初飛
馬邑關中馬正肥
日旰山西逢驛使
殷勤南北送征衣

書石壁

王氏

何事潘郎戀別筵
歡情未斷妾心懸
汰王灘下相思處
猿叫空山月滿船

宋

霍岳

杜衍

萬古神山入盛談而今真得對晴嵐
禪門邂逅能留客
茶泛磁甌酒欲酣

玉兔寺

王隨

霜毫感應早呈祥誰布黃金建寶坊
古殿幡花遶真聖
美名靈跡異諸方

殿庭松柏午陰濃地占神山絕境中
瑞質有靈千古在
金田疑是玉蟾宮

遊開化寺

在舍利山

韓琦

蒙山崦裏藏神宮，朝蒼暮翠嵐光濃。
枯松老柏競醜怪，危巖峻嶺相彌縫。

潞安城南柳林二首

歐陽修

一路黃沙白日寒，柳林秋色送征鞍。
更堪昨夜西風落，霜葉烟條太已殘。

野路籬花放盡新，古墩殘柳閱黃塵。
葉稀風起逢搖落，猶挽長條贈遠人。

嵩巫亭

富弼

平地烟霄此半分
繡楣丹檻照清汾
風簾暮抱秋空碧
刺見西山數嶺雲

過李長者故居

楊謨

方山百里路崎嶇
按部因尋長者居
伏虎已歸天女去
隴頭新見萬松株

三月晦日登豐州故城

司馬光

春盡蕪城天一涯
白榆生莢柳生花
滿川戰骨知誰罪

深屬來人戒覆車

過北平王祠

唐相靈祠古到今
庭前槐栢綠成陰
昔時圖像雖通妙
難狀籌謀爲國心

夷齊

夷齊雙骨已成塵
獨有清名日日新
餓死溝中人不識
可憐今古幾何人

題岢嵐軍雲際寺

邵堯夫

烟嵐一簇峙崔嵬到此令人心自灰上有神仙無姓氏
洞門閒倚白雲開

謝王澤州寄長松兼簡張天覺二首

蘇軾

莫道長松浪得名能教覆額兩眉青
便將徑寸同千尺知有奇功似茯苓

憑君說與埋輪使速寄長松作解嘲
無復青黏和漆葉枉將鍾乳敵仙茅

三陽山

陳希夷

華山高處是吾宮
出即凌虛跨曉風
臺殿不將金鎖閉
來時自有白雲封

題陽關圖

黃庭堅

斷腸聲裏無形影
畫出無聲亦斷腸
想得陽關更西路
北風低草見牛羊

駐竒嵐軍

日斜汾沁催騎馬
雪暗竒嵐傳酒杯
塞上金湯惟粟粒

胸中冰鏡是人才

過靈泉寺四首

黃廉

烏噪僧眠春晝遲
松陰樓殿日高時
入門未脫征裘立
拂壁先看學士詩

六年道路三經此
山色泉聲似故人
慚愧老僧相慰問
官郎何事過門頻

瘦馬行行不著鞭
一逢泉石便留連
每來無可相求索
只是松牕借榻眠

攬勝尋幽本爲閒可能忙裏去游山權宜且輟公家事
看徧林泉夜始還

明仙訪上人不遇

蘇過

暫拋塵土叩雲扉山色空濛翠濕衣澗水松風俱有恨
道人瓶鉢幾時歸

羅漢寺

段讓

解職歸來謝世譁東風閒步到僧家何時許我棲雲榻
夜掃寒爐煮雪花

題紫團山三十六景

王案

迎暘峰

陽燧初升八極車飛光猶帶赤城霞
山英固有葵心在不許羣峰取次遮

倚秀峰

山形疊疊掩禪關長薄蕭森落照間
天女欲誇新結束都將翠藻簇煙鬟

天杠

不分蒼梧西北傾只將一柱與撐撐而今六幕安然處
不使斯人樂太平

磨崖

家山本與語溪接使節曾過砥柱遊見說紫團銘勒處
西風千里重回頭

濯纓溪

江上老人終獨往塵中孺子果何知溪翁欲識滄浪意
看取青霄浸月時

東華表

借問遼東鶴歸來得許悲浮生隨念變何待塚累累

附

西華表

寄謝西朝相神奸古有圖如何延客處庭燎照豐狐

附

碧蘿峰

風曳山妃帶雲穿木客衣青松容嫋嫋紅葉半飛飛月

爲幽人罷春從舊處歸明朝碧峰外試與絆斜暉

附

金屋山

雲拂層峰四面朝朝陽北過更岩崑金仙自合居金屋
不爲膠東貯阿嬌

鷓鴣尾山

天借溪頭奠佛居全將帝所作規模漢家不識真鷓鴣尾
何笑區區問越巫

山翁崖

仙翁愛山居留形在東嶺風林度嘯聲雲壑漾飛影華
髮欲蕭蕭青瞳猶耿耿追踪有名流回首發深省

附

駐雲亭

塵迹初從世網收
一邱一壑此優游
却應化作飛雲片
長向亭前伴客留

老人峰

江廬已別游河侶
商洛休陪謁漢賓
獨立南山千嶂裏
長將萬壽祝嚴宸

南極園

清徵有逸仙疇昔下南極
紫氣遠成圖照此太白域
芝

田手所耘地靈亦知香雲根一十八剎握安可得惟餘
亂峯間喬林竦寒色

附

紫團勝賞聞之舊矣壺關大夫俾圖作讚欲得予詩
時在管城錦繡潭上自食至晡三十六景賦之遍點
竄一二字耳因以草卷寄之時政和六年秋九月既
望乙巳輔道書郡志曰輔道書字神竒原刻十二石
亦以搨本累僧碎之埋於山麓後人踪跡掘之止得
八石嵌之慈雲寺壁間後止存四石順治十八年知

縣朱輔移置學宮

安邑飲葡萄酒詩

王孚

風含翠蔓舞蒼虬
露濕驪珠拂素秋
釀酒儘堪留客醉
比來何必問涼州

王官瀑布

雷臨

區區奔走漫華巔
一別王官十四年
綠玉峽中噴白玉
溉田澆竹滿平川

三門砥柱

張保源

鑿開山骨過長河水土方平叙九歌舉世但傳神禹力
誰人知是帝功多

游休休亭

鄭集

世事心知不可爲拂衣歸此養天機先生獨善端無意
冒續春秋辨是非

前題

蔣之奇

勢利煎人漫白頭休休去是良謀應須買取堪騎鶴
跨入芝田閬苑游

訪王官谷休休亭二首

仇伯玉

飄香山徑踏殘花來訪仙鄉
隱處家當日廟堂延至計
未應懷壁老煙霞

山鷄營巢欲哺兒
晴杏拆早先離披
盤回一徑穿碧篠
谷口數家耕水湄

游王官谷

王干

耐辱幽人不願名
一邱一壑遂高情
門前流水無冬夏
想見先生到骨清

前題二首

王欽臣

表聖於文尚未高善將名利比秋毫
王官谷裏當安臥天子呼來亦遯逃

鍾鼎山林出處明中間不合枉高情
有錢須買王官谷流水聲中過一生

去任辭湯廟

張之才

一官來此四經春不負蒼天不負民
神道有靈應信我去時猶似到時貧

金

按部道中二首

蕭貢

窟野河中水沒腰管岑官路雪封條
一年樂事能多少
強半光陰馬上消

寒城睥睨插山隅
秋半霜風塞草枯
月轉譙樓天未曉
角聲吹徹小單于

寄嵐

寄嵐地勢橫三汊
河朔城墉挂一簣
紫塞高連寒日短

黃榆落盡長年悲

後趙

擬倫人物指高光可笑臬雖不自量正使成名皆豎子
英雄也未到君行

真容院詩

魔宮佛界等空虛此理何曾屬有無直向臺山始相見
可中還有二文殊

讀火山瑩禪師詩卷

禪師隰州白氏岐山令召舉
樞判文舉之弟自幼有詩

名河東嘗有詩云十日柴門九不開松庭雨後
滿蒼苔草屨挂起跣趺坐消得文殊更一來歸

寂後客有示其
集者因題其上

長短都歸一夢中
身前身後兩無窮
李愷信士今如在
定向江湖訪澤公

戊戌二月中旬登稷山清榭

張萬公

問因推案朝還莫危坐
不知春淺深今日檐間看風色
一株紅杏暗驚心

疊翠樓

郝侯

畫樓西畔石州山
指點雲烟識翠鬟
回首十年真一夢
淡天如水夕陽間

過胥相墓

密國公璫

亭亭華表映朱門
始見征西宰相尊
下馬讀碑人不識
夷山高處望中原

瓶形嶺早發

元德明

海雲蕭瑟雪花乾
人在羊腸百八盤
閒客不知名利苦
見時應作畫中看

山園梨葉有青紅相半者戲作一詩

霜輕霜重偶然中一葉雖殊萬葉同不信世間閒草木
解隨兒女作青紅

過鳳皇山

鳳皇聞說似天壇北去南來馬上看想得松聲滿岩谷
秋風無際海波寒

沁水山寺

王寂

兩峽山高月半輪五更人起馬嘶頻無端又上長安道

輸與僧牕飽睡人

自靈泉寺詣偃月山

李廣

立馬松間首重回，亂峰無數翠成堆。
爲尋偃月山前路，直向白雲深處來。

白巖寺羣山環抱村落相望亦奇觀也惜乎無水
因作絕句書石當有水出

李晏

只有山光無水聲，我疑神物固巖扃。
如何鑿得飛泉出，當爲山僧叱六丁。

山寺尋春春已歸紫梅猶有折殘枝老僧兀坐如枯木
花謝花開總不知

題郝文忠公墓

伏節江南羨此行真州猶稔使君名佳城鬱鬱埋西澣
恨不生還蘇子卿

鳥影過寒塘

武天和

著眼分明莫作疑從來形影本同歸不應水底青天上
更有飛禽仰面飛

題都君錫隱居

李安時

恬處深山物外身，門前常是聚蹄輪。
已知谷口馳名久，孰謂清朝乏子真。

寒食次陶公韻二首

趙安時

莫怪山城後放花，神靈秘惜晚生芽。
他鄉早發還先謝，春色都留聚我家。

宛似安仁滿縣花，風流善政作根芽。
太平官府看看見，再活疲民數百家。

送二道者歸汾州

許安仁

介休山下兩閒人來訪汾陽舊使君
明日却歸塵外去一雙白鶴上青雲

青塚

王元節

環珮魂歸青塚月琵琶聲斷黑山秋
漢家多少征西將泉下相逢也合羞

卽事二首

劉昂

雨洗明河畫扇收胡牀露冷藥闌秋
牆陰未得中庭月

一點螢光草際流

山花山雨相兼落溪水溪雲一樣閒
野店無人問春事
酒旗風外鳥關關

王官谷

潛溪時照塵埃客微雨不遮天
柱峰斜日落花人去盡
淡煙樓閣數聲鐘

題王官表聖祠

姚仿

表聖當年曾退棲林泉良是昔人非
可憐天柱千尋立

竟日無人空翠微

游王官谷謁司空表聖祠三首

蔡珪

簿書期會敢遷延
暫爾城樓借榻眠
咫尺王官未能去
俗緣妨我愛山緣

黃塵烏帽走西州
溽暑秋霖兩滯留
居士有靈應見笑
微官何事不休休

雲裏高欄面面風
欄邊列樹障秋空
憑君爲我開穠綠
盡放南山入眼中

醉經齋爲虞鄉麻長官賦

周 昂

詩書讀破自融神不羨雲安麴米春黃卷至今真味在
莫將糟粕待前人

贈益公和尚還超山

王庭筠

平沙漠漠鴈翩翩風弄菰蒲水拍天短艇得魚撐月去
一聲漁笛破寒煙

八月十五日過泥河見鴈

家在孤雲落照間行人已上鴈門關憑君爲報平安信

才是雲中第一山

蔡村道中

楊雲翼

水連深竹竹連沙村落蕭蕭已暮鴉行盡畫圖三十里
青山影裏見人家

陽春門隄上

薄薄晴雲漏日高雪消土脉潤如膏東風可是多才思
先送輕黃到柳梢

北園

劉從益

碧梧斜影落胡牀
白葛烏巾滿意涼
宴坐不知紅日晚
笋輿歸路麥花香

食松子

雷思

千嵒玉立盡長松
半夜珠璣落雪風
休道東游無所得
歲寒梁棟滿胸中

題天柱峰

一峯凝碧倚晴空
一水縈紆一徑通
中有幽人猶說古
誰知高興與今同

藏雲洞

仙人愛茹紫芝香
占得中條最上方
何事紅塵飛不到
幽居常被白雲藏

憩三詔亭

王伯迪

水竹蕭森一徑開
濯纓亭下洗塵埃
情知相約皆無實
不礙偷閒乘興來

望天柱峰三絕

李楫

買得王官作主人
青山伴侶碧溪鄰
千緘盡散傍人手

想見清無一點塵

先生節義全終始名與青山萬古高
遺像僅存人已遠
滿室修竹冷蕭騷

仕路奔馳兩鬢華誰能來此老烟霞
而今三詔亭前水
都屬尋常射利家

游王官谷

王隆吉

不見高人耐辱公倚天山色自清雄
憑君莫促東州駕
且看蒼崖瀉玉虹

遠祖鴈門武皇

李汾

死心唐室正諸侯鐵馬南來隘九州當日三垂岡上意
諸孫空抱腐儒羞

讀裕之弟詩藁有鶯聲柳巷深之句漫題三詩其
後

元好古

阿翁醉語戲兒癡說著蟬詩也道奇吳下阿蒙非向日
新篇爭遣九泉知

鶯藏深樹只聞聲不著詩家畫不成慙愧阿兄無好語

五言城下把降旌

傳家詩學在諸郎剖腹留書死敢忘背上錦囊三箭在
直須千古說穿楊

崆峒山圖爲橫溪翁賦二首

劉祖謙

好奇仍有客相攜絕頂披雲快一躋三十六峯青似染
五年拄笏羨橫溪

獨占名山每羨渠京塵今日汙吟鬚西州十載經行處
惆悵雲烟是畫圖

寄陳正叔雷希顏

劉光謙

東南形勝古徐州人物休評第幾流
落落陳雷天下士故應連榻臥黃樓

李鴈門

史公奕

天下三分二屬梁區區獨木欲支唐
錦囊三矢傳遺恨不救朱三著赭黃

西京道中

蔡松年

來時綠水稻如鍼歸日青梢沒鶴深
莫忘共山買田約

藕花相間柳陰陰

蘭相如墓

田天澤

翠疊峰巒步幃新上卿廟貌萬年春
可憐完壁歸來後故里蕭蕭也入秦

山中

馬天來

青林寂寂鳥關關畫出風煙落照間
脫却草鞋臨水坐野雲分我一邊閒

山陰縣

史肅

湧雲驅雨不成霖
山徑危行未要深
午夢初回烏鳥樂
小亭斜日柳陰陰

寶嵩僧舍

宗道

寂寂鐘魚栢滿軒
午風輕颺煮茶烟
西堂竟日無人到
只許山人借榻眠

文中子讀經

董文甫

紛紛述作史才雄
聽似秋來百草蟲
不是春雷轟蟄窟
蚓蛇會得化成龍

晉祠

史士舉

小橋流水竹蕭森
竹裏人家一徑深
只欠東風小籬落
梅花疎淡月籠陰

糧山積雪

王綱

休糧山頂雪成堆
趙壁秦城迹已埋
獨喜豐年應有兆
陽春一曲向誰裁

遊棲巖寺

張瓚

林表招人白塔明
竹間蘭芷石泉清
惠崇水墨西軒景

烟帶平蕪水帶城

清明上巳游春

劉汲

山城無事早休衙
閒逐東風看落花
行處不敢呵喝鬧
恐驚林外野人家

過興儒里

顏諮

雲林垂幕覆山村
半嶺牛羊日已曛
名謂興儒應不妄
太平今日正崇文

王官飛湍

陳庚

表聖當年愛此山倚樓終日看飛湍後人空飲貽溪水
不學先生便挂冠

三門集津圖

閻長言

津門未爲天下險勿作駭相觀茲圖偃月堂中李林甫
有人能寫此心無

題裕之樂府後

王中立

常恨小山無後身元郎樂府更清新紅裙婢子那能曉
送與凌煙閣上人

述懷

何宏中

馬革盛尸每恨遲
西山餓路更何辭
姓名不到中興歷
付與皇天后土知

遊天壇雜咏五首

元好問

芳樹陰陰鳥語譁
綠雲晴雪映紅霞
青山可是堪人恨
藏著中岩十里花

漫山白白與紅紅
小樹低叢看不供
總道植花香氣好

就中偏愛玉瓏鬆

花名

溪童相對採椿芽指似陽坡說種瓜想得近山營馬少
清秋深處有人家

湍聲洶洶落懸崖見說蛟龍擘石開安得天瓢一翻倒
躡雲平下看風雷

仙壇倒影鳳麟洲一道雲光插素秋也是天公閒不得
海東移著海西頭

南樓

汀樹微茫岸草青渟沲四月水泠泠鳳山可是生來巧

堪與南樓作畫屏

過鴈門關二絕

雞聲未動發南樓
澗水隨人向北流
欲望讀書山遠近
鴈門關上懶回頭

稜層石磴倚高梯
穹谷無人綠樹齊
總爲古來征戍苦
宿雲常傍塞垣低

登臺山雜詠五首

西北天低五頂高
茫茫松海露靈鼇
太行直上猶千里

井底殘山枉叫號

山上離宮魏故基
黃金佛閣到今疑
異時人讀清涼傳
應記諸孫賦黍離

一國春風帝子家
綠雲晴雪間紅霞
香綿穩藉僧溪草
蜀錦驚看佛鉢花

沈沈龍穴貯雲煙
百草千花雨露偏
佛土休將人境比
誰家隨步得金蓮

靈蛇不與世相關
時復蜿蜒水石間
何處天瓢待霖雨

一籠香火梵仙山

翠巖峰

顛風作力掃陰霾
白日青天四望開
好箇臺山真面目
爭教坡老不曾來

真容院

兜羅綿界寶光雲
雲際同瞻化現身
解脫文殊俱有說
是中知有木強人

錦繡峰

登臨夙有故鄉緣試手清涼第一篇
知被錢郎笑寒乞
不將錦繡裏山川

登龍和山

懸麻白雨映層崖過盡行雲晚
照開可是登臨動高興
馬蹄新自太行來

遊天池

天池一雨灑塵埃全晉堂堂四望開
不上朝元峰北嶺
眞成不到此山來

聖阜山

馬水橫陳聖阜前
滹沱陂堰遠相連
魚多只說牛家滙
何處秋風有釣船

讀書山居

斜陽高樹挂晴虹
肅肅微涼雨氣中
一道鷺鷥花不斷
密香吹滿馬頭風

西溪二仙廟留題

期歲之間一再來
青山無恙畫屏開
出門依舊黃塵道

啼殺金衣喚不回

過故關

過關天日正清明誰道山神不世情
遠客得歸心緒別隴汧間作斷腸聲

鄉郡雜詩二首

予家自五代以後自汝州遷平定宋末又自平定遷於忻故文字中

以平定爲鄉郡

一溝流水幾橋橫岸上人家種柳成
來歲春風一千樹

綠烟和雨暗重城

新堂縹緲接飛樓雲錦周遭霜樹秋若道使君無妙思
冠山移得近城頭

石勒問道圖

輕比韓彭作李陽高僧久已笑君狂中原果有劉文叔
肯向鈴聲替戾岡

題金鳳井

此地曾云海眼開古今人喜暢奇哉料應丹穴相穿透
飛出摩天金鳳來

前高山

蛟聚蛙喧杳不聞
已甘麋鹿與同羣
胸中所得知多少
半是青松半是雲

寄女嚴

鶴崖魚窟路間關
旬月無絲一往還
寒食歸寧見鄰女
舉家回首望西山

度石嶺

四海虛名直幾錢
世間何恨好林泉
無情石嶺關頭路

行去行來又十年

初學家還讀書山雜詩二首

天門筆勢到閒閒
相國文章玉筍班
從此晉陽方志上
繫舟山是讀書山

眼中華屋記生存
舊事無人可共論
老樹婆娑三百尺
青衫還見讀書孫

家山歸夢圖

遊騎北來塵滿城
月明空照漢家營
卷中止有家山在

一片鄉心畫不成

南關二首

風裏秋蓬不自繇
一生幾度過隆州
無情團栢關前水
流盡朱顏到白頭

路轉川迴失繫舟
更教兩驛過徐溝
多情團栢關前水
却共清汾一處流

過龍泉寺

泉石烟霞自一家
殘生隨分了生涯
雞鳴山下題詩客

曾到靈巖不用誇

河邊黏齏尚能飛無角無麟自一齊甲子紛紛更兒戲
壁間休笑阜昌題

遠渠寒溜夜潺潺說有蛟龍在石間可惜九天霖雨手
一泓泉水伴僧閒

砥柱

南北爭教恨大江吳家纔了又陳亡畫工只說三門險
不記茅津一葦航

元

讀遺山詩四首

劉秉忠

劍氣從教犯斗牛
百川橫放海難收
九天直上無凝滯
更看銀河一派流

北里笙歌勸酒杯
南隣門巷冷如灰
秋風萬里方搖落
叫殺孤鴻春不回

青雲高興入冥搜
一字非工未肯休
直到雪消冰泮後
百川春水自東流

雲霞閃鑠動霓旌
轟磕征輦震地聲
千里折衝歸指畫
將壇孫子獨論兵

題李晉王墓

李俊民

雄名凜凜震沙陀
爲國功深奈老何
多少三垂岡上恨
伶人那進百年歌

關將軍廟

鼎足相吞勢未分
誰能傾蓋得將軍
曹吳不是中原手
天下英雄有使君

和平大行路韻

鑿開險阻若天成
暫使時間眼界平
却羨長安西去路
青山不管送人行

游司馬山

千年古廟映崇岡
寂寂空庭草樹荒
見說旱時求得雨
一池應有老龍藏

卜居

東鄰西舍兩三家
簌簌牆頭落棗花
慚愧畫梁雙燕子

笑人今日又天涯

水簾洞

倒傾蛟室瀉瓊瑰
派落空巖雪浪堆
卷地風姨收不起
素娥垂下玉鈎來

雪後送寶泉之碧落

酒面輕風不作寒
天花散落滿人間
殷勤行腳休辭遠
出得城門是雪山

弔石勒塚

郝經

都門長嘯氣憑凌
瓜葛中原霸業興
夜葬山間人不見
至今猶有廬墳僧

禹廟

王惲

大地河山繡錯明
野烟孤廟枕荒城
杜鵑饒舌知何事
血灑東風怨未平

遊棲嵒寺三首

翠嵒回抱鬱蒼官
絕境軒橫杳靄間
老矣瑞峰名寺僧
應

健在護持長伴八龍閒

宇文周末年大集釋教有雲延師有遊隱北山久之有然叟日

來聽經后師道成復有七人者來師問故曰予
八人皆龍也其一已傳師教故予等亦來受戒

一徑縈紆入杳冥望川亭迥夕陽明欲知眼界寬多少
故出秦川似掌平

層巖重倚尚斜陽山下風煙一漫蒼恨殺愛山王老子
不來同宿贊公房

過虞坂

雞聲茅店月微茫山遠行人促曉裝良馬虺隤身自健
不須拭目認孫陽

鹽池

解梁城下解鹽池萬寶騰光奪日輝
我欲大觀窮化窟乳泉一賦了天機

沁水山中雜咏二首

石徑穿雲曲又斜蒼松影裏見仙家
一溪流水清如玉送出山中自落花

山中夏日似秋涼小小幽花暗暗香
獨臥客牕清不寐滿庭風月野蒼蒼

過橫望嶺

終日山行不厭山
出山聊喜慰衰顏
朝來橫望關頭路
滿目風煙看洛川

澤潞卽事雜思三首

自占徒兵澤潞雄
選齊尤見四州公
堂堂氣與輦聲壯
閃閃旗翻日脚紅

角聲催日上牙城
白羽風清坐閱兵
盾鼻恐煩磨檄墨
莫教華髮等閒生

一檄風馳萬有降
天兵開國古無雙
寄聲壁月瓊枝客
鐵鎖休誇一葦江

莊宗橫吹圖

郭相西征奏凱還
阿嬌歡寵鏡交鸞
却嫌暖殿春風燠
玉管橫翻曉吹寒

王官飛湍

石竇懸流雪練飛
夜深和月映松扉
恨我不遇貽溪老
一笑山間說化機

汾睢懷古三首

武皇誇大喜，雄奇出汾陰。
恐事爲更著，壽王相斌媚。
守經深見漢，儒卑

神倪三面削，蒼崖中擁汾。
陰寶氣開夾道，老槐君莫訝。
虬枝曾拂漢旗來，

畢祀汾陰事已亡，尚留奎翰繪春光。
年年依舊秋風起，
滿徑黃花空自香。

李陵臺

袁 楠

雪滾寒沙風滾灰
眼穿猶上望鄉臺
隴西可是無迴鴈
不寄平安一字來

汾水秋風

段成已

一曲劉郎發棹歌
歡聲未已耐悲何
只今回首空陳迹
依舊秋風捲素波

仙掌擎月

月出山頭未數竿
仙人掌上玉團團
瑞光冷射三千丈
絕勝碧蓮峰下看

虞坂曉行

林外晨雞第一聲
隴頭殘月伴人行
未知局促鹽車下
老驥蕭蕭又幾鳴

首陽晴雪

薇歌一曲對西山
萬古清愁老翠巒
望斷空巖人不見
光搖銀海玉峰間

贈師品卿

老大溪山入夢頻
強憑圖畫寫情真
歸與不及身強健

山有英靈恐笑人

雲中暮雨

古壘雲藏一徑微
河山依舊昔人非
貪徵徃古興亡事
不覺城頭雨濕衣

登臨晉製錦樓

王思誠

製錦樓高倚縣衙
神宮佛殿帶人家
晚來縱目憑軒望
日落崦原散彩霞

臨晉道中

嶺原回首望汾陰寶鼎精銷瑞氣沈千古帝王行幸地
草荒輦路暮雲深

沙陀晚行

曹之謙

野曠天晴落日黃西風衰草白茫茫窮邊四望行人絕
惟見孤雲逐鴈行

虞坂曉行

長坂悠悠接古虞行人鞍馬問征途寒鴉隱樹鳴初起
殘月低山淡欲無

馮小憐

楊維禎

前山較獵御同車一笑平陽等戰蝸
挽得后衣才上馬琵琶又入代王家

玉峰山

張守大

與客攜琴到玉峰琪花瑤草遶仙宮
道人亦喜招凡客話盡黃庭月上桐

過陳司諫墓

劉祁

鸞坡烏府舊遊空三尺孤墳野寺中
猶有憂時心不死

墓門昨夜起秋風

七星臺

王泰亨

雲低天濶七星臺
鳴鴈遠銜霜信來
汾水晉山今古夢
夕陽無語重徘徊

羅漢寺

喬君章

芙蓉綽約水雲鄉
百畝濃陰一徑長
暫喜借牀尋好夢
不知身世在平陽

汾州北席里石氏節婦

陳旅

北里高樓晝掩扉
水銅光冷上苔衣
寸心誓比南山石
汾水秋風鴈不歸

巡蒲化樂道中

李文煥

滑滑春泥徧野田
行人恐濕錦障鵲
停驂暫借山中宿
長日悠悠酷似年

春丁即事

杜思名

乍階燈火已闌珊
向晚東風却作寒
須信人間歡會少
金荷倒捲不辭乾

虞坂曉行

陳庚

五更風露正清冥
馬首殘蟾分外明
好句墮前俄失去
微吟條過古虞城

馬首山

宋克篤

馬頭山望紫金山
中有仙人自往還
多少塵緣消不盡
謾勞魂夢翠微間

題二賢祠

楊奐

從經採懿狎孤兒
世事尤非扣馬時
若道後人真可誑

空山焉有二賢祠

癸丑二月望奉天楊奐題首陽山夷齊廟同里王琛張端平陸貞擇從行

春丁即事

張浩然

一代文章復炳然
泮宮俎豆會羣賢
闌珊燈火人歸後
門掩西風又隔年

松子嶺

張仲尹

密密松陰遮嶺面
層層山勢插雲衢
時人畫重王維筆
到此還應畫得無

松峰書院寄孔伯儀二首

呂思誠

玉瓶攜酒遠相邀
羸馬何思道路遙
流水遶門山色近
薰風楊柳亂鳴蜩

夕陽林樹欲棲鴉
偶到東山處士家
松子嶺高嵐氣潤
幽軒開碧落松花

荆浩秋山問竒圖

吳鎮

霜落林端萬壑幽
白雲紅葉入溪流
朝來尚有尋真至
共向山亭領素秋

北極山

連綰

撐破白雲積翠環孤峰遙倚北辰間
黎川歷歷憑高望
幾點村煙落照間

和

江受益

奇峰翠律出雲霄更比終南太華高
萬壑煙霞深有意
向人招隱莫徒勞

繡屏山

連際

削玉青山列臥屏
野芳如繡照人明
天教遮護黎侯國
不蔽西周討亂兵

和

江受益

翠屏橫列隔塵寰
煙靄空濛映遠山
千古若非佳勝地
白雲安得一生閒

臥牛峰

連 綮

濯濯齊郊懶借名
一峰突兀自爲情
疑從脫駕桃林後
芳草青青臥太平

和

江受益

不分山骨與牛形
巖洞腹空石脊平
恨殺農夫鞭不起

一犁好雨誤春耕

題明仙寺

彥齡

路轉花溪不踏塵
仰頭人語半天聞
到門不計山重數
但覺衣襟有白雲

留題南趙古廟

胡巨源

麟皴老樹鐵生斑
神宇荒涼野壑閒
地僻無人秋寂寂
一川紅影夕陽間

代王城

李溥光

一脈金波喚作泉孤城小小帶疎煙從容三讓登車後
黼黻炎劉四百年

文谷道中

小倉月

釋

星河空翠撲人衣細路東風却水西青嶂馬蹄三峽曉
淡烟花木子規啼

晉溪

靈祠金壁水雲間澤國蘇民玉一泉幾點白鷗紅蓼岸
渡頭煙月洞庭船

明

漳川秋晚

潘安王朱銓錄

漳川綠水抱新堤
風月無邊任品題
獨把釣竿歸興晚
夕陽野鳥傍人啼

宿沁水山店

張昌

屋頭山色晴煙重
枕底溪聲客夢涼
却羨主翁無世慮
石牀高臥咏滄浪

登玉清宮四首

曾是瑤臺醉月人
錦袍猶帶碧桃春
神仙有路誰知處
復向蓬萊問玉真

黃金百鍊本來真
物外寧知別有春
袖却當年修月手
廣寒宮裏伴閒人

沁水南來帶淺沙
江邊仙館并川斜
道人不解紅塵事
閒坐蒼苔數落花

怒風挾雨捲飛沙
雨過琳宮月已斜
天氣晚涼宜客臥
隔牆香是紫薇花

段干木祠

王翰

殺妻吳起非良將
食子樂羊真鄙人
爭若先生無一事
西河能解虎狼秦

瑤臺夜月

一逕穿雲小洞天
槩楠千尺宿風烟
清溪遶屋歸來晚
月滿瑤臺秋滿天

栢塔秋風

一塔崔巍駕碧空
森森翠栢起秋風
雲深寶殿無人到

咫尺仙居未許通

禹城朝雨

一天疎雨亂山低
誰喚扁舟過小溪
何處鏘鏘響瓊玉
飛泉只在禹城西

碓寺晚鐘

梵宇峰頭鎖暮烟
寒鐘初動月娟娟
衲僧講罷歸來晚
一百八聲霜滿天

秦樓夕照

樓閣參差倚翠微
蹇馱醉抱琴歸
清高自得林泉趣
千朶芙蓉照夕暉

巫谷晚晴

積雨初收巫谷春
蹇馱何處共尋真
白雲東望瑤臺近
千樹碧桃和露新

條山積雪

踏遍溪橋不見梅
高吟天地靜無埃
舉鞭可是瑤臺路
自怪曾騎白鳳來

凍水橫橋

凍水西風曉雨收
馬蹄蹀躞過溪頭
扁舟誰唱江南曲
鴈落平沙烟水秋

并州寒食

浦源

夢入故園千里遠
覺來寒食在并州
垂楊不是相思樹
那得花開便白頭

雙花嶺

王達善

樺樹亭亭立澗隈
兩僧遺跡已成灰
夜深風響岩前葉

疑是雙筇步月來

度桑乾

三月清冰潔似銀
黃沙兩岸不知津
可憐一片無情地
水亦年年解渡人

題玉龍洞

千尺危橋跨兩崖
土龍飛去殿崔嵬
試教偷眼看沙漠
馬上人如一蟻來

春日嘉溪

耿綱

嘉溪春暖柳垂絲上有黃鸝深處啼
挾彈或驚公子過
耕雲飛去夕陽西

蘭相如

高啓

危計難成五步間
置君虎口卒全還
世人莫笑三閭懦
不勸懷王會武關

雲中曲

盧柟

高關塞頭殺氣橫
居延川內少人行
黃沙欲沒李陵墓
明月長懸蘇武城

題延壽寺壁

李漁

虎頭山下楓林月
雁尾溪邊野寺鐘
底事逢僧耽話久
萬峰杳杳白雲重

寧武關

城邊無日不風沙
白草黃雲萬里賒
夜夜城頭聽戍柝
吹殘隴水又梅花

興讓里

薛瑄

岐陽日色正輝輝
纔被餘光便息機
卻把爭田為棄土

頓令江漢總思歸

后土祠

一木為橋渡斷溪
山山水水冷淒淒
千年古廟藏崖下
萬里黃河正在西

宿長平弔賈魯

長平驛是相公家
不見當時富貴花
只有蒼蒼喬木在
至今猶宿夕陽鴉

沁水行臺初春睡起

于謙

雪消土潤草痕青
煙暖風柔柳帶輕
啼鳥一聲來枕上
夢回春意滿山城

題留耕亭卷二首

邢讓

方寸良田遺後人
仁耕義耨可終身
不須歲歲占風雨
管取豐登過四鄰

白玉黃金謾作堆
他年徒為子孫危
遺安有道春常在
惟有襄陽老父知

雲中即事

王越

金之川ノ二八
卷二百二十六
二月山城雪尚飛
年年草色見春遲
不知上國間桃李
開到東風第幾枝

宿武鄉鋪

喬宇

前林昏黑引松明
忽聽雷鞭殷地聲
恰有郵亭堪寄宿
空山風雨夜三更

平定郝家泊

王瓊

數派清泉石際生
潺潺流出珮珂聲
古今遊客知多少
誰識無窮造化情

蒲州普救寺別景良弼

王雲鳳

古寺秋風酒一杯
河聲山色坐中來
相攜更上高原望
多少園亭畫裏開

過強記村有感

劉龍

花時興入趙家村
邀我嘗春老瓦盆
南望故廬剛二里
夕陽誰為倚柴門

條山麓鋪呂子與蘇守設酒相待呂出所賦桃花
詩因漫成五首

康海

誰謂峰陰春事遲
亭臺處處有花枝
芳花自惜春風好
不道衰翁鬢已絲

弱柳迎風太不禁
天桃夾岸笑春深
朝辭函谷尋君至
羨爾春山方獨吟

十年一見復逡巡
百歲如斯豈是頻
不向郵亭飲美酒
桃花笑殺五陵人

自別承明二十年
春風三過武亭川
條山更聽桃花曲
何啻華陽脩竹篇

絕壁香來花已飛
背巖雲暗濕羅衣
知君習靜栖山郡
笑我尋春却釣磯

過壽陽次韓昌黎韻二首

陸深

又從東北望長安
玉宇瓊樓高處寒
四月炎涼渾未定
一杯閒啜小龍團

無心是處夢魂安
古柏臺深五月寒
自笑青山老居士
松牕閒殺舊蒲團

雲中曲送人十首

李夢陽

自從虜逼鴈門關漢家四野多空壘行子遙遙看獨戍
桑乾水水暮沙起

壯士驅車出漢關馬頭絲絡紫金環莽莽黃雲迷代北
淒淒白霧滿燕山

季冬飲馬長城窟沙磧飛揚帶白骨榆塞嶺邊聞鬼啼
猶是今年戰亡卒

黑帽健兒黃貉裘匹馬追胡紫塞頭相逢不肯通名姓
但稱家住古雲州

城上黃旗張暮天元戎宅內鼓闐闐底事鄰悲并巷哭
雲州明日是新年

紫水東來入黑河紇干山下雪花多小兒攔街吹觱篥
婦人能唱海西歌

白登山寒低朔雲野馬黃羊各一羣冒頓曾圍漢天子
胡兒惟說李將軍

黃毛愛子出打圍昏宿李陵古臺下忽傳烽火入邊城
城中將軍夜秣馬

戰士黃鬚立道傍自言曾射左賢王可憐孤績無人論
贈與青裴白馬郎

北風吹日馬毛僵腰間角弓不可張逢君莫唱雲中曲
臘月雲中更斷腸

端氏城

楊子器

端氏城西縣路斜行人無地問三家尊前休唱銅鞮曲
風颭椒條落細花

題畫桑維翰缺研

唐寅

書生豪氣壓千軍
示者扶桑一卷文
鐵研未穿時世改
功名回首信浮雲

麝香

張信

山麝逃風遠谷藏
一山行過四山香
齋堂自養千鈞弩
枉怨虞人鼻孔長

和王公遊藐姑射山作二首

元王惲有遊
姑射洞詩

常倫

野亭酌酒水潺湲
畫出崔嵬鏡裏山
接離倒載山翁醉
落盡青天日未還

河東城西姑射山蓮花秀出洞雲間欲借使君行樂處
吾將從此謝人間

憶王屋山人

孫一元

幾時不見鹿皮翁回首碧雲天自東記得去秋新月夜
豈花棚下說年豐

權店驛題

韓邦奇

四月深山似九秋瀟瀟寒雨長離愁仲宣無復荊州意
日暮他鄉一倚樓

題襄陵分司三首

汾水春深落晚霞沿堤十里盡桃花
畫船簫鼓遊人醉漫說風流是杜家

薰風綠沼碧荷香玳筵歌兒舞袖長
一醉襄陵傾百盞不知風景是平陽

姑射泉邊萬竹稠清風樓外四山秋
重陽醉後歸來晚黃菊紛紛插滿頭

題山南洞

王崇慶

洞口仙人去未還
桃花流水自閑閑
天風搖落暮雲碧
海鶴一聲醉夢間

晚登沁州城有感

謝榛

蒼茫野色幾沙灘
漳水東流倚堞看
烟火滿城天向夕
一鷗飛過不知寒

蒲州酒清冽
芬旨與羊羔並
而不羶
遠出桑落裏
陽之上特以遠故不易得

王世貞

屑瓊為麴露為漿
超出人間色味香
應從帝女傳遺法

不向河東羨索郎

娘子關偶成

夫人城北走降氏娘子軍前高義旗今日關頭成獨笑
可無巾幗贈男兒

題馬嶺山中泉自嘲魚呈于鱗子與

拆峽分流各吐奇爭先翻道出山遲即令到海成何事
竟日行吟無倦時

太原酒頗清醇而不甚釀難醉易醒余嘗取其初

熟者以汾州羊羔釀半嘗之瀉水晶杯不復辨
色清美為天下冠一時諸公嘖嘖犇飲至醉

未應誇調和羹手偶向尊前壓獻酬他日邯鄲解圍後
與官求作醉鄉侯

羊羔酒出山西汾州孝義諸縣白色瑩徹如水清
美饒風味遠出襄陵之上小挾羶氣耳

清心玉映五銖衣可是朱顏有愠羝為道臯蘭秋月下
流蘇帳底見明妃

襄陵酒出平陽襄陵縣色黃白香醖而所致者多
過甘不堪釀獨趙兵巡齋兩甌味極殊絕累白
不厭以無甘味故也

消然甘露布松梢似玉如飴味更饒尚有碧霄真沆瀣
無將一滴貯天瓢

食潯沱魚戲作

潯沱魚尾真金赤况復車輪敗後炊三輔周遭二千里
從今魚樂也應知

潞州鮮紅酒蓋燒酒也入口味稍美易進而作劇
吟咽間如刺或云即葡萄酒遺法也

潞州城中酒價高胭脂滴出小檀槽華胥一去不易返
漢使何煩種葡萄

遊西山絕句九首

王道行

飛瀑

搖空珠瀑瀉銀河客倚絲桐發浩歌流水聲中意無限
落花千片奈愁何

懸崖

龍閣千尋嵌碧空
翠微窮處乍聞鐘
白雲仙人迎人吠
幻作龍吟在水中

觀濤

峽束奔流勢轉高
渦盤碣石小秋毫
淹留不盡憑欄興
遲爾仍觀八月濤

入峽

遍插芙蓉亦太奇
極天鳥道水之湄
清魚野衲能相餉

步櫟萋萋不厭遲

石家硯

風磴靈雲猿度愁行行中道幾人留
平田忽出藤蘿外
水湧蓮峰九派浮

宿龍鳳寺

百尺垂虹控紫烟
逶迤閣道邈難攀
我來亦是巢居子
夜半濤聲枕上懸

元泉寺

山腰解束見平阡海會同歸極樂天方外吾非一宿覺
堂中人是五燈傳

七佛標靈山上山天門陡絕水潺湲相傳心印無些子
只在堂頭麈尾間

胭脂坡

落花流水帶胭脂窈窕春山看作眉直北胡姬羞奪色
降王何處正愁思

清涼石

臺東一片清涼石多少遊人說靈跡不辨龍蛇遠策行
金蓮隱隱扶雙屐

拜二虎和尚墓

短幹長髯老比丘多年說法野干愁懶朝金闕隨中使
飛錫騰空復履留

陽曲灣作二首

高叔嗣

閒庭芳草日分長疎雨高槐夏轉涼一片鄉心千里目
青山無數晚蒼蒼

胡天杳杳夏吹風涼雨濛濛夜已空夢入梁園樵采路
覺來身在戍樓中

題李節婦郭氏

任環

孀居寂寞已多年玉潔冰清出自然此事難將塵土暗
裝黃進入九重天

佛耳摩雲二首

張鐸

百道飛泉遶翠微四圍丹嶂映禪扉時看關雀汙經案
似解真僧已息機

狹徑前村人去獨長空斜日鳥飛雙憑軒一幅春山畫
漫學丹青寫北窓

大通寺見芍藥

曾 鉞

底事匆匆春已闌花時每惜賞花難翻憐野寺風光別
麥已黃時見藥欄

雲中樂

朱日藩

塞門楊柳未經霜錦帕貂裘馬上妝帶得相思出關去
銀釵嶺上斷人腸

境中勝槩二首

朱繪

玉屏山高雲木蒼六月山陰冰雪涼淨掃雲烟眠石榻
山人無夢不羲皇

娘子關頭水拍天老君洞口赤霞懸驚雷激浪三千丈
洞裏仙人不得眠

題忠順夫人畫像四首

于慎行

燕支山色點平蕪染出春愁上畫圖一曲胡笳明月夜
邊聲又度小單于

邊城新舞柘枝辭
降得渾邪罷漢師
不道長安春色少
甘泉宮裏畫關氏

天山獵罷雪漫漫
繡袂斜隈七寶鞍
半醉屠蘇雙頰冷
桃花一片殢春寒

蓮花寶鈿綠雲鬟
不脫檐櫺款漢關
枉殺白登城下畫
虜中原自有紅顏

紅線詩五首

屠隆

結束戎裝劍陸離
月華星彩共低垂
嚴城秋冷銅焦死

魂斷三千外宅兒

龍文匕首髻烏蠻一霎遙空响珮環
街鼓未休營卒卧
滿身風露魏城還

直拂銀河織女機天風颯颯泛霞衣
手持北斗黃金合
千里關山度若飛

忽離瑤筵下玉階湘裙低覆蹋雲鞋
情知不是人間別
歌散香銷十二釵

金銀宮闕是儂家
整捕鸞釵拂鬢鴉
一逐孤雲天外去

朱門空鎖碧桃花

虎溪軒

董其昌

仲舉無心除一室
盧鴻有句寫千峰
欲參茗帚間中意
九點秋山雨後容

夜抵平刑關

邢大道

猶龍紫氣自西來
入夜關門帶月開
俗吏只今非尹喜
青牛亦識是仙才

忻州白鶴觀
自唐開元間
每歲二月望
羣鶴戾止

因以得名事見元遺山記遺山自謂幼及兩見兵
荒後不至矣寥寥至今且踰三百年昨歲丁酉州
城告完高堅異常仲春月滿之期羣鶴復集觀上
羽族飛類得氣之先或不誣矣稍稍修葺其觀存
故跡耳因為絕句二首

魏允貞

白鶴觀頭白鶴羣土人不見只曾聞誰知三百年來後
又覩聯翩下碧雲

百年築地議紛紛經始功成早報聞不信胎禽齊候月

為看雉堞已連雲

題三娘子畫像三首

馮琦

攏轡春暖鎖芙蓉
爭羨胡姬拜漢封
統膝錦欄珠勒馬
當胸寶袂繡盤龍

塞北佳人亦自饒
白題胡舞為誰嬌
青霜已盡邊城草
一片梨花冷不銷

紅妝一隊陰山下
亂點駝酥醉朔野
塞外爭傳娘子軍
邊頭不牧烏孫馬

除夕太原府四首

程可中

鴈門南渡路千盤殘歷猶從馬上看醉抱白頭燈影下
錦箏搗殺不成驩

逆旅相留慰苦辛蕭蕭同侶二三人
篷中誰譜梅花引已送江南十日春

檀槽鐵撥索絲絃此技都誇三晉專
里耳只今貪小令金元遺調漸無傳

城闕春潛雪盡融誰家花勝出王宮
更寒緩下歲筵鎖

元旦催傳進樂工

初宿海會寺二首

李 叢

靈泉流水夜淙淙
月小松高鶴影雙
石榻覺來秋燭冷
諷經聲滿碧山牕

聽泉問竹開珠閣
剔蘚看碑坐翠微
碧殿秋來人跡少
天風時動六銖衣

武林館中與徐仁卿同宿因贈

徐 渭

長說邊關好試材
幕中進止自須裁
連宵一騎重圍裏

不見釣州王秀才

時王邦直
為虜所害

邊詞

黃酋墮馬已成禽
漢卒爭功被脫身
魂魄至今留黑石
兜鍪連歲落魚鱗

漢軍爭看繡裯襦
十萬彎弧一女郎
喚起木蘭親與較
看他用箭是誰長

長纓解取鎖嬌嬈
馬上纖腰恐不牢
好把鴛鴦韉上腦
倩誰雙縛馬鞍韜

女郎那取復皋英此是胡王女外甥帳底琵琶推第一
更誰紅頰倚蘆笙

老胡寵向一人多窄袖銀貂茜巨羅遮與遼東黃鸝子
側將雲鬢打天鷲

姑姑花帽細銀披兩靨腮梨酒練椎個個菱花不離手
時時站馬上胭脂

咏米山

李雪山

積雪如山夜唱籌廉頗為趙破秦謀將軍老去三軍散

一夜青山盡白頭

曉發漳源

張鉉

一夜秋風捲浦霜
曉來黃葉亂飄颻
獨憐山鳥依巢近
不似征人在遠鄉

南山看牡丹

瞿潛

山深夏半尚飛霜
穀雨花開麥漸黃
莫怨東風遲爾意
洛陽先發早飄颻

覆宿山

王鎬

何年天上殞真星化作奇峰萬丈清
北至雲中南石嶺
行人一望識佳名

北斗山

峰勢連環似七星
嶙峋香色倚天清
夜深斗柄東西指
山與天樞一樣橫

題辣

曾將踪跡驗圖經
出沒知時信有靈
莫訝近來年不稔
一泓深處靜潛形

高歡城詩

劉遂初

魏相旌旄夕未還
鄖公名節益人間
盛時文化無烽火
玉壁關頭月滿山

馮衍

王 鎰

馮衍才華世絕倫
時清主聖不容身
江淹賦裏誰堪恨
獨有關門對孺人

懷五臺舊居

德 清

叶斗峰頭雪未消
別來音信久寥寥
炎方屢夢經行處

曳杖閒過獨木橋

送人還壺關

明周

林花未吐怯輕寒人在天涯送客還
千里好山迎馬首白雲飛處是壺關

晉臺獨夜

文鳳翔妻武氏

晉臺玉鏡照春流綠草朱鱗步步幽
百子帳頭香自暖銀牀歸坐夜懸鉤

余秦中女子也幼承父訓頗能詩畫不幸二九喪

匹今年二十有一矣又遭難被虜路過平陽偶

書一絕以待知音

失名名媛

萬樹飛沙雜暮烟
鬢雲歷亂舞風前
馬強手弱寒鞭滯
回首鄉關落日邊

國朝

舊有樊川圖不知者每以杜曲相擬近以午亭山
村自別石谷為予畫之

陳廷敬

虞山粉本富陽翁老去仙人隔閭風前世畫師今在眼

依稀黃石是黃公

午亭山莊圖詩五首 有序

酈道元水經注沁水逕午壁亭而南友人朱竹垞謂予何不取以名其園比同在內直輒好語山水園林之勝於是玉峰尚書為作午亭記當時予未嘗有園也已而家居闢山村股濂泉之水鑿池其中橫橋小舟咫尺具煙波之勢以實竹垞之命果有午園矣蓋予所居樊川終累牧之城南下杜之稱思有以別之且吾居近午壁

亭沁水之涯也爰即樊川故居又名曰午亭山村午亭之
間山高水清林廬池舫幽居之跡則王君石谷為予畫焉
使玉峰而在當為更作一記他日請竹垞為予記之夫
五畝一區而為名之多如此甚矣夫吾之溺於其名也
午壁亭名載水經秦時流水漢時亭何人更與桑欽注
一畝園中水木青

午亭人在翠微間林際清暉自往還砥柱析城至王屋
天教看盡好雲山

吳松煙雨石湖春不到江南老竟真山水連天溪艇窄
也能作意向詩人

西湖杭穎別圖經吳楚湖山兩洞庭獨訝樊川同小杜
朱坡不比漢家亭

丹青老手荆關筆重寫天隨舊釣船晚喚午亭還識不
世人曾擬杜樊川

懷七柿灘

洞陽風落滿林霜葦蔗甘寒味許長解道黃柑三百顆

不如紅柿熟千章

野史亭

柔翰功名一葉萍也將文字照丹青
朱門萬戶淒涼盡惟有元家野史亭

郭景純墓

香火情多故國緣來看靈爽在江天
後湖亦借公名重多恐先生是水仙

元日毛錦來寄辛復元先生遺書語錄十三種展

讀有賦

魏象樞

汾河設教又河津羽冀尼山一派真千百年來誰繼續
絳州夫子是天民

遺書遠寄自平陽司李重封墨幾行獻罷椒花開卷處
上元別是一春光

布粟從來意味長三更續火復燒香守先待後人難見
彷彿當年坐講堂

宗社安危話不虛廟堂東帛意何如可憐扶地撐天手

空付江西薦士書

望應州塔

十里烟雲一望通
浮圖如削插長空
何年種得菩提子
幻出金蓮大地中

遊百穀山

失名

幽谷登臨眼界遙
峰巒隱隱水迢迢
君親南北懸情切
不問仙人王子喬

硃砂洞

趙三麒

金史卷一百一十六
卷一百一十六
洞裏有天堪十月桃源無路可尋仙撥開赤水山頭望
衝破丹爐一徑烟

醉雪石

露濕秋雲杖履寒蓬萊踏遍遇仙難何如謝傳東山屐
遠黛眉尖一色看

卜子講壇

四首

畢振姬

五老巔岼草木童西河詩景對秋空小冠子夏盲於易
文學初傳河上公

魚鱗濕氣薄雲屯假蓋應憐子夏貧避雨峭陵一百里
泥封無路上星辰

學樂聽詩以未成中山風什小戎聲晨鐘喚出西河守
吳起猶嫻曾子兵

函谷緒經義不臣道存天地轉鴻鈞五千牛腹沈雲氣
夫子西遊不到秦

雪後望吉祥寺松

雪隱禪花石磬閒上方僧袖帶雲還一龕冷浸琉璃鏡

金分四八
卷二十六
門外蒼龍吼萬山

雨中度故關

王士禎

危樓飛流萬仞山
戍樓遙指暮雲間
西風忽送瀟瀟雨
滿路槐花出故關

郭有道墓

大槐坂上逐車塵
爭效先生折角巾
至竟清流解亡國
望門投止是何人

謁文忠烈公祠

精神如破貝州時晚節猶能動四夷天遣不同韓富沒
姓名留冠黨人碑

洪洞縣謁韓忠定公祠

弘恭已自收蕭傳夏憚翻能殺呂強枉使空同奮刀筆
子規不勸李東陽

晉興澤

陳奕禧

鹽道峰巒望絕奇涑川長泛晉興陂張陽猶指東張在
事業韓曹久不知

翠屏俯接水雲鄉
晶熈清陂廿里長
却怪漁人間不得
黃蘆深處曉鳴榔

方山

方嶺磻溪隱者居
援蘿尋葛興何如
鴛鴦漿頂上無人跡
誰識銅芸與女疎

送吳濩入太原三首

朱彝尊

娘子關西木葉殘
烟霜回首井陘寒
馬頭不改團團月
絕壁韓詩拂蘚看

并州山繞岫，蒼桐葉祠前。
栢幾行，蘋號長生水難老。
憑君抄入篋中方。

周郎幾在近在蓮花幕，點筆題詩興不孤。
暇日經過頻問訊，硬黃曾搨石經無。

題吳徵君雯詩卷

藉甚吳郎大雅材，賦詩不上栢梁臺。
翻飛却似橫汾鴈，幾度秋風上苑來。

再度雁門關

時聞舍弟
吳鑒病卒

雁門關北雁初飛
萬里征人淚濕衣
回首秋風行已斷
天南消息到應稀

明妃曲

上林消息斷歸鴻
記抱琵琶出漢宮
紅顏近來憔悴盡
春風更遜畫圖中

扈從雜記三首

高士奇

雄關一綫倚天開
峭壁攢崖入五臺
極目雁門沙塞遠
雪中更得辨纖埃

佛頂分來五髻青，浮空鳳刹玉輿停。
茜衫黃帽搖金

鐸，宮錦齊開梵字經。

紫府仙山寶輿區，長杉鬱鬱壑爭趨。
興來那得勾龍爽

重寫峰巒入畫圖。

宣和畫譜載蜀人劉龍爽有紫府仙山圖

再遊小岵山

白尹謙

千尺崖間挂古松，泉聲無恙答山鐘。
游人指引松間路，踏破蒼雲數十重。

過火燒嶺

李煥斗

策馬崇岡行步難杏花枝上鳥緡蠻自從身作延陵長
幾度衝寒過此山

鵬王崖

邑之東北石崖故名下即箭溝

趙漪

壁立峻嶒似落猿蒼鵬飛處見荒村時聞虎嘯空山裏
常囑癡兒緊閉門

元姬山

高嵐

螺髻雲裳塵外妝春風艷艷麝蘭香山禽似託當時曲
婉轉人前弄巧簧

仙人洞

石鳳臺

栢林常挂青霞色
蘿洞時飛丹竈煙
往日夢游今日到
翠微掩映水涓涓

人日渡桑乾

沈會霖

一灘縑水織長堤
積雪迴風度午溪
馬首寒鴉飛復落
不知春在雁門西

沙米葉

此種惟塞北產之余解其葉可作羹即千歲穀

杜登春

沙場紅葉關芳辰
千歲名傳穀粒勻
剪取作羹柔滑甚

秋來何必更思尊

弔晉太子耶律妃墓四絕墓在城南二里許俗稱
淨梵王太子妃者可發大喙且謗佛矣詩並正
之

康乃心

琉璃碧瓦照蒼苔猶似鸞車寶扇開妙麗夫人應有相
故教金粟傍如來

題大同觀音寺梅

徐化溥

誰把羅浮向此移清芬禪味兩相宜便當攜手趙松雪

來訪中峰百韻詩

晚瀉軍持灌玉芳
蚤傳春信到禪房
絕塵應少繁花色
入定偏來自任香

玉泉漱石

李芳黃

幽壑泉飛瀉建瓴
松溪繚繞出沙汀
中流漱玉猶堪枕
直砥秋濤一柱清

方山謁李長者祠讀華嚴論二首以呈長者長者
得無拈花微笑否
何世璠

空林晏坐得神全
天女提壺亦偶然
但使此心無虎在

諸君何必愧通圓

長音

古栢千章遶佛廬

金剛

名一滴水成渠就中多少西來

意蛇足華嚴論未如

游筆架山次白玉蟾韻

性善

釋

白雲隱沒舊山家
活計甜齋與苦茶
睡起不知人世事
石臺講罷落天花

五里莊壁上重書義棠橋詩

愛玉

名媛

霧鬢風鬟亂曉妝淡雲孤月影微茫自憐薄命同秋草
戎馬鞍頭困海棠

全題

結束殘妝向北征朔風吹雨淚無聲可憐目斷江雲裏
縱有思親夢不成

詩餘

唐

河瀆神

閻選

汾水碧依依黃雲落葉初飛翠娥一去不言歸廟門空
掩斜暉 四壁陰森排古畫依舊瓊輪羽駕小殿沈沈
清夜銀燈飄落香炷

定西番

雞祿山前遊騎邊草白朔天明馬蹄輕 鵲面弓離短
鬚彎來月欲成一隻鳴髀雲外曉鴻驚

金

玉樓春

宴河神
瑞雲亭

馮延登

長原迤邐孤廩臥野色微茫河界破草承行屨綠雲深
花觸飛丸紅雨安高亭初試煎茶火醉玉漸譁春滿
座行盃莫厭轉籌頻佳節等閒飛鳥過

浣溪沙

河中環勝樓感懷

李獻能

垂柳陰陰水拍堤欲窮遠目望還迷平蕪盡處莫天低
萬里中原猶北顧十年長路却西歸倚樓懷抱有誰
知

梅花引

過天門關作

趙秉文

金方口八ノ二
卷二 百二十六
山如峽天如席石顛樹老冰崖圻雪霏霏水洄洄先生
此道胡爲乎來哉石頭路滑馬蹄蹶昂頭貪看山奇
絕短童隨皺雙眉休說清寒形容想更飢

驀山溪

賦崇福荷花崇
福在太原晉溪

趙可

雲房西下天共滄波遠走馬記狂游正芙蓉平鋪鏡面
浮空欄檻招我倒芳尊看花醉把花歸扶路清香滿
水楓舊曲應逐歌塵散時節又新涼料開徧橫湖清淺
冰姿好在莫道總無情殘月下曉風前有恨何人見

望海潮

代州南樓

雲朔南陲全趙幕府河山襟帶名藩有朱樓縹緲千雉
回旋雲度飛狐絕險天圍紫塞高寒弔興亡遺跡咫尺
西陵烟樹蒼然時移事改極目傷心不堪獨倚危闌
惟是年年飛雁霜雪知還樓上四時長好人生一世誰
閑故人有酒一尊高興不減東山

婆羅門引

保德西樓作

李晏

汗融畏日豈知高處有風清倚闌襟袖涼生坐上看崩

雲脫懷不礙亂峰青待目窮千里却怕傷情
河汾古城聽裂岸怒濤驚好是烽沉幽障鼓臥邊亭西樓老子
更無用胸中十萬兵酒到處莫放杯停

雁邱二首

元好問

問世間情是何物直教生死相許天南地北雙飛客老
翅幾回寒暑歡樂趣離別苦就中更有癡兒女君應有
語渺萬里層雲千山暮雪隻影向誰去

橫汾路寂寞當年簫鼓荒烟依舊平楚招魂楚些何嗟

及山鬼暗啼風雨天也妬未信與鶯兒燕子俱黃土千秋萬古爲留待騷人狂歌痛飲來訪雁邱處

元

浣溪沙二闕

晉溪

姜彧

方丈惟空瞰碧潭潭光山色靜相涵開軒千里供晴嵐
流水桃花疑物外小橋烟柳似江南挽將風月入醺
酣

山滴嵐光水拍堤草香沙暖淨無泥只疑悞入武陵溪

兩岸桃花紅日出四圍高柳到天垂一尊心事百年期

鷓鴣天

晉溪

滿谷瀟瀟落葉黃繡衣驄馬駐平岡一川野色迷秋色
四面山光接水光花作陣酒爲漿晉祠風物正重陽
慇懃留住皇華使同放乾坤入醉鄉

點絳脣

天聖宮

郭章

翠栢丹崖碧雲深鎖神仙府勢盤龍虎樓觀雄中土

我欲停時又恐斜陽暮黃塵路客懷良苦滿目西山雨
明

清音亭

張昌

四面嵐霏簇綺筵雙渠流水響涓涓蕭瑟西風吹敗葉
一葉葉一枝枝都是行人恨別離

踏莎行

鄆韓

韓邦奇

高嶺連雲寒烟帶雨長楊滿路悲風起將軍墓上草蕭
蕭荒祠白日眠孤鼠九里山前未央宮裏淒涼往事

頻胸臆烏江汾水雨悠悠東流不盡英雄泪

減字木蘭花

行部
大守

失名

槐陰正午颯颯涼風生綺戶減却行厨野蔌山殽自有
餘重盤累櫟盡是生民膏與血寄語諸賢幾處來朝
竈未烟

國朝

喫酒兒

喫酒兒鳥聲也故山多有余於
薊門道中偶聞之遂成二闋

白戶謙

喫酒兒細叮嚀酒杯到手不須停眼前有酒不盡醉枉
向醒時林下聽

喫酒兒喚路衢酒旗招處盡情沽客舍三更眠未穩枝
間啼鳥笑人愚

千秋歲

呼秋阜城訪
曹陶庵孝廉

王維藩

澗曲峰迴游盡秋難賦鴈不到將秋誤啾唧壁無蛩蕭
瑟山無樹人止見鬢邊昨夜霜微度

瀟灑淡如菊潔靜人如玉枕孤邱蛻世俗安步以當車

晚食以當肉晏如也萬壑秋風藏公腹

菩薩蠻

送當如弟入
秦時客臨汾

顧貞觀

秋空倚劍人何處
羈心遠掛咸陽樹
隴水咽殘星
黃河西畔行
幾多鄉淚滴
一夜關山笛
誰按小伊州
清霜入鬢流

菩薩蠻

早發星
太行山絕頂處

山城半夜催金柝
酒醒孤館燈花落
牕白一聲雞
枕函聞馬嘶
門前烏桕樹
霜月迷行處
遙憶獨眠人
曉寒

驚夢頻

滿庭芳

同朱子作

曹溶

殿宿莓苔岡平鼎顛虛寢遙控簾鉤義兒成隊左右列
松楸誰放沙陀雁影盤仙李飛入并州收京闕赤心家
世長拱紫宸樓英雄誇亞子提刀百戰囊矢前騶漸
司香遺廟墮玉荒邱事去棠梨漫落渾沱化淚點長流
金鳧出伶官天下麥飯一時休

夏初臨

天龍寺足高歡避暑宮舊址

朱彝尊

賀六渾來主三軍隊壺關王氣曾分人說當年離宮集
向雲根燒烟一片氤氲想香姜古瓦猶存琵琶何處聽
殘勅勅銷盡英魂 霜鷹自去青雀空飛畫樓十二冰
井無痕春風裊娜依然芳草羅裙驅馬斜陽到鳴鐘佛
火黃昏作殘僧千山萬山涼月松門

蝶戀花

重遊晉祠題壁

十里浮嵐山近遠小雨初收最喜春沙軟又是天涯芳
草徧年年汾水看歸雁 繫馬青松猶在眼勝地重來

暗記韶華變依舊紛紛涼月滿照人獨上溪橋畔

虞美人

寒食太原道中

去年寒食橫汾曲曉雨平蕪綠今年寒食尚橫汾又聽
錫簫吹入杏花村古今多少橫汾客飲馬臺駘澤并
州雖好不如歸輸與一雙新燕舊巢飛

桃源憶故人

祁縣登樓作

高樓百尺誰家院靜鎖歲華春晚可惜蝦鬚簾卷只是
無人盼登樓搔首斜陽滿風起落花如霰可惜鵝兒

金方日
酒暖只是無人勸

畫堂春

徐溝道
上作

東城朝日亂啼鴉
雨晴芳草天涯輕塵初碾
一痕沙何處香車
春水青羅帶緩
春山碧玉簪斜
春風依舊小桃花
花外誰家

摸魚子

贈吳大章

愛蓮洋無多行卷才華直恁明秀
紛紛日下柴車至逸藻吳郎
希有李十九慣把汝詩篇三載
藏懷袖今秋邂

迢便訪我城東涼波殘月曉度玉河柳 交期合不在
時時握手傾心偶共杯酒六街聽倦鼕鼕鼓頗厭征衣
塵垢殘雪後待驅馬蘆溝轉入孤山口蒼厓若白伴翠
竹黃梅香林守歲清興爾能否

柳梢青

應州客感

金鳳城偏沙攢細草柳擘晴綿九十春來連宵雁底幾
日花前 禁他塞北風烟虛想像湖南扣舷夢裏頻歸
愁邊易醉不似當年

清平樂

馬中邑

客何爲者日日風塵惹燕子春來秋又社萬事不如歸也
家書字字行行秋深只道還鄉不信行人更遠黃沙白草茫茫

鎮西

送陳六謙之官安邑

雪晴鳩鵲正酸風交射河橋外鴈壺重瀉沉吟者計郵籤此去娘子關西春光滿野琴堂到時元夜蘭燭爍玉鈎山翠繞畫簾靜也料哦松合多亭榭堪游冶笑丞

哉何負紙尾交箱龍蛇恣寫須添墨池官舍

河瀆神

妒女祠集句

山木女郎祠

維王

西路翩翩去時

韓

綵旂新翦綠楊絲

莊

槐花點散采愚

陳元初

練帶平鋪吹不起

李

漠漠黃花

覆水

朱

繡領任垂蓬髻

杜牧

含情咫尺千里

魚元

菩薩蠻

登雲中清朔樓

夕陽一半樽前落月明又上闌干角邊馬盡歸心鄉思
深不深 小樓家萬里也有愁人倚望斷尺書傳鴈飛

秋滿天

采桑子

雲州書感

去年一丈天山雪凍鵲枝頭暢好春游到得春來祇是
愁
炎風匹馬黃塵裏又盼清秋涼月南樓到得秋來
總是愁

燕山亭

清明日王湛求方伯招同劉津逮趙秋水毛子霞孔子威飲金粟園杏花下

鐘鼓新晴立馬斜陽滿樹顰脂透深映短牆曲護危闌
更綴數行風柳燕外遊絲惹多少粉香紅溜依舊正一

笑花前去年時候 況值寒食佳辰問挑菜何人鬪雞
曾否春衫試罷玉笛吹殘須盡百壺清酒剛得黃昏又
疎影月明如晝搔首想來歲故園渡口

蘭陵王

過晉藩
舊邸

馬蹄捷遙望參差雉堞斜陽外芳草斷垣朱邸猶存舊
城闕平臺歌吹絕禁得黃鸝調舌妝樓畔烟柳樹株時
見柔條路人折 閒尋老翁說記帶指黃河圭翦桐葉
霓旌千騎春山列任桂樹招隱鴈池斟酒回眸琴瑟看

盡滅問誰是豪傑 明月最淒切聽短笛飄零哀角鳴
咽葳蕤不閉牕紗裂有藥鼎霜碓畫廊塵扉界恩深鎖
兔苑冷一片雪

虞美人

雲中送俞右吉
之鄴下集句

來時萬里同爲客

文司明

廣武原西北

張祐

看看北鴈又南

飛

施肩

慎莫愁思顛顚損容輝

王維

無端更渡桑乾水

賈行路難如此

杜

蕭蕭羸馬正塵埃

羅隱

烟裏歌聲隱隱

機元

入叢臺

上官儀

消息

度雁門關


千里重關憑誰踏遍鴈銜蘆處亂水滄沱屑霄冰雪烏
道連勾注畫角吹愁黃沙拂面猶有行人來去問長塗
斜陽瘦馬又穿入離亭樹猿臂將軍鴉兒節度說盡
英雄難據竊國真王論功醉尉世事都如許有限春衣
無多山店酎酒徒成虛語垂楊老東風不管雨絲烟絮

滿庭芳

李晉王墓下作

獨眼龍飛鴉兒軍至百戰真是英雄沙陀去後席卷定

河東多少義兒子將千人敵一一論功爭誇道生來亞
子信不媿而翁前驅囊矢日三垂岡上置酒臨風歎
綠衣天下回首成空冷落珠襦散盡殘碑斷不辨魚蟲
西林外哀湍斜照法鼓影堂中



山西通志卷二百二十六